

საოცნა ვმგზავდი

# ჩვენი თოვლის ბაბუა





შორს, შორს კავკასიის მთების ძირში, იქ, სადაც მიწას მუდმივად ფაფუკი თეთრი თოვლის საბანი ახურავს და ხეებსაც ფიფქებით მოქარგული თეთრი კაბები აცვიათ, ტყის განაპირას დგას ხის ქოხი, რომლის ფანჯრებზეც ყინვას თეთრი ფუნჯით ზღაპრული გამოსახულებები მოუხატავს. სახურავს კი ირგვლივ უამრავი ბრჭყვიალა ყინულის ლოლო დარაჯებივით შემოხვევია.

ქოხის საკვამურიდან მუდმივად ამოდის კვამლი. ირგვლივ კი თოვს და თოვს.

სწორედ ამ ქოხში ცხოვრობს ყველაზე კეთილი, თმაქალარა და თეთრწვერა მოხუცი, ჩვენი თოვლის ბაბუა ფერიებთან, თეთრ არწივთან და უამრავ ლაბუა ჩიტთან ერთად.







ეს ჩიტუნები მთელი წლის განმავლობაში დაფრინავენ საქართველოს მთასა და ბარში, ქალაქებსა და სოფლებში და ყველა ბავშვის ამბავი თოვლის ბაბუასთან მიაქვთ.

მას ბუხარზე ორი წიგნი უდევს, ყვითელი და თეთრი. ყვითელ წიგნში ყველა იმ ბავშვის სახელია, ვინც ცუდად იქცევა. ფიფქებით მოხატულ თეთრ წიგნში კი მხოლოდ კარგი ბავშვების სახელებს წერს.

აღბათ, ფიქრობთ, ჩიტები რა ენატანიები ყოფილანო, არა? მაგრამ თოვლის ბაბუამ ხომ უნდა იცოდეს, რომელი ბავშვი იმსახურებს საახალწლო ოცნებების ახდენას.

როცა თოვლის ბაბუასთვის გასაგზავნად ბარათში თქვენს სურვილებს ჩაწერთ ან დახატავთ (ეს იმ შემთხვევაში, თუ ჯერ წერა არ იცით), ის გარეთ, ფანჯრის რაფაზე, დადეთ. იქვე საკენკის დაყრაც არ დაგავინყდეთ.



ჩიტუნები დაპურდებიან. შემდეგ თქვენს ბარათს პატარა ნისკარტს ჩაავლებენ და თოვლის ბაბუას ქოხისკენ გაფრინდებიან. ქოხის სახურავზე, საკვამურის გვერდით, მეორე პატარა საკვამურიცაა, საიდანაც არასოდეს ამოდის კვამლი. თქვენგან წამოღებულ ბარათებს ჩიტუნები სწორედ ამ საკვამურში ჩაყრიან, საიდანაც ისინი პირდაპირ თოვლის ბაბუას ოთახში, სურვილების სკივრში ცვივა.





დათოვლილ ქოხში, ბუხარში მოღულუნე ცეცხლის პირას, სავარძელში მოკალათებული თოვლის ბაბუა რიგრიგობით იღებს სკივრიდან თქვენს წერილებს, გულდასმით კითხულობს, შემდეგ გადაამონმებს, ბარათის ავტორი რომელ წიგნში ჰყავს შეყვანილი და თუ მისი სახელი თეთრ წიგნში აღმოჩნდება, ბარათს ფერიებს გადასცემს, რომ საჩუქრები მოუმზადონ.

კეთილი ფერიები მთელი წლის განმავლობაში მუხლჩაუხრელად შრომობენ, რომ თოვლის ბაბუას თქვენთვის საჩუქრების მომზადებაში დაეხმარონ. ისინი ქსოვენ თბილ ქუდეებსა და ხელთათმანებს, ქრიან, კერავენ და ქარგავენ თოჯინების ტანსაცმელს. მოხატავენ და აფერადებენ სათამაშოებს, ავლებენ ათასობით ჩურჩხელას და ამზადებენ გოზინაყს. უკვე გამზადებულ საჩუქრებს კი ყინულის კოშკში ინახავენ.







კოშკი ხის ქობის გვერდით დგას და მასში ერთადერთი შესასვლელი მხოლოდ თოვლის ბაბუას ოთახიდანაა.

რას არ ნახავთ აქ, საბავშვო წიგნებსა და სათამაშოებს: თვალეზბრიალა თოჯინებს, ფერიებს, ქალთევზებს, საყვარელი ზღაპრის გმირებს, კოსმოსურ თუ ზღვის ხომალდებს, დინოზავრებს, რობოტებს, შოკოლადით სავსე ბრჭყვიალა კოლოფებს, გოზინაყს, ჩიჩილაკებს, ყველაფერს, რასაც ბავშვის ფანტაზია გასწვდება და რასაც იგი ისურვებს. ყოველ მათგანს წარწერა ახლავს იმ ბავშვის სახელით, ვისთვისაცაა განკუთვნილი. ირგვლივ ყველაფერი ბრჭყვიალებს და ცისარტყელას ფერებით იფრქვევა. კოშკის თავზე კი თეთრი არწივი ზის და გულმოდგინედ დარაჯობს.





და, აი, დგება ახალი წლის ჯადოსნური ღამეც. ამ დროს განსაკუთრებული მხიარულება და ფუსფუსია ქობში. ფერიებს ყინულის კოშკიდან საჩუქრები ქვემოთ ჩამოაქვთ და თოვლის ბაბუას ხურჯინში უწყობენ. ეს უბრალო ხურჯინი არ გეგონოთ, ჯადოსნურია და იქ ყინულის კოშკში შენახული ყველა ბავშვის საჩუქარი ეტევა.

ფუსფუსია ქობის გარეთაც, სადაც მარხილში შებმული ვერცხლისრქებიანი და ყელზე ეყვნებჩამოკიდული ორი თეთრი ირემი დგას. ირგვლივ კი სიხარულისგან თვალეგაბრწყინებულ უამრავ ტყის სამეფოს ბინადარს მოუყრია თავი: კუდფუმფულა ციყვებს, თეთრ ბაჭიებს, ზღარბუნიებს, რუხ მგლებს, შვლებს, მელაკუდებს, მთებიდან ჩამოსულ რქებჩაგრებილ ჯიხვებს. დათუნიებსაც კი გამოუღვიძიათ ზამთრის ძილისგან მხოლოდ ერთი ღამით და ისინიც თოვლის ბაბუასთან მოსულან საჩუქრების მოლოდინში.



და, აი, ქოხის კარი იღება და იქიდან წითელ ჩოხაზე თეთრნაბადნამოსხმული თოვლის ბაბუა გამოდის, მხარზე გადაკიდებული ხურჯინითა და ხელში დიდი ყანწით. უკან ფერიები მოაცილებენ.

მის გამოჩენას ეზოში ყველა სიხარულითა და ყრიაბულით ხვდება. თოვლის ბაბუა ყოველ მათგანს ასაჩუქრებს და მარხილში ჯდება.

ყველაფერი მზად არის ღამის ჯადოსნური მოგზაურობის დასაწყებად. ის ძალიან ჩქარობს, რომ გათენებამდე ყველა ბავშვის სახლში მოასწროს მისვლა და არცერთი მათგანი ახალი წლის ღამეს უსაჩუქროდ არ დატოვოს...

ქათქათა ფიფქების კორიანტელში დაიდრნენ ირმები ეჟენების წკარუნით. უამრავი ფრთებდაფიფქული ჩიტუნა მხიარულად მოაცილებს თოვლის ბაბუას მარხილს დათოვლილ ტყეში, რათა ირმებს გზა არ აებნათ. მათ ხომ ზუსტად იციან, რომელ სახლში რომელი ბავშვი ცხოვრობს.






და სწორედ მაშინ, როცა მოფარფატე ფიფქები ღამეს სადღესასწაულოდ მორთავენ და ახალი წელი ყველა სახლის კარს ქართული მრავალჯამიერით შეაღებს, თოვლის ბაბუაც მაშინ დააკაკუნებს კარზე. იქვე თოვლს ჩამოიბერტყავს და გახარებულ მასპინძლებს ახალი წლის დადგომას ღვინით სავსე ყანწით მიულოცავს.

შემდეგ ფეხაკრეფით მიუახლოვდება მძინარე ბავშვის საწოლს, დათრთვილული წარბების ქვემოდან კეთილი ღიმილით გადახედავს და სასთუმალთან პატარა ჩიჩილაკს დაუტოვებს, რომელზეც ხილი, პატარა ბროლის კოშკი, თეთრი არწივი, ყანწი, ქვევრი და რქებდაგრეხილი ჯიხვი ჰკიდია. ნაძვის ხესთან კი





პატარა მოქარგული ხურჯინით საჩუქრებს დაან-  
ობს. და ახლა სხვა სახლისკენ გააგრძელებს გზას.

ასე დადის მთელი ღამე თოვლში გახვეულ სო-  
ფლებსა და ქალაქებში და საჩუქრებს უსასრულოდ  
არიგებს და არიგებს, ვიდრე არ ინათებს.

თქვენ კი, ბავშვებო, როცა გაიღვიძებთ, თუ სა-  
წოლთან პატარა მორთული ჩიჩილაკი დაგხვდათ,  
იცოდეთ, რომ თურმე სანამ გეძინათ, თოვლის ბაბუა  
გსტუმრებიათ. სასწრაფოდ გაიქეცით მოციმციმე  
ნაძვის ხესთან. იქ მისი საჩუქარი გელით.

და გახსოვდეთ, რომ სწორედ მაშინ როცა, თქვენ  
სიხარულისგან გაბრწყინებული თვალებით მის მო-  
ტანილ საჩუქარს ხსნით, ჩვენი თოვლის ბაბუა და-  
ცარიელებული ხურჯინით, ძალზე დაღლილი, მაგრამ  
უზომოდ ბედნიერი, მიაქროლებს ირმებს უკან, თა-  
ვისი ქოხისკენ... ბედნიერი იმით, რომ თქვენი პატარა  
გულების გახარება შეძლო.



ISBN 978-9941-0-5893-6



9 789941 058936



ეს პატარა წიგნი გახლავთ ავტორის მოკრძალებული მცდელობა და უდიდესი სურვილი, რომ ჩვენს შვილებს შევეუწარჩუნოთ, ეროვნული სიმბოლოებით გავემდიდროთ და უფრო მიმზიდველი გავხადოთ ის ლამაზი ზღაპარი, რომელსაც თოვლის ბაბუს ამბავი ჰქვია.

გამომცემელ-რედაქტორი: ხათუნა გოგბაძე  
მხატვარ-ილუსტრატორი: მალხაზ რუსაძე